

*Feliz
Dianan di
Fiesta!*

ISLA ONLINE

Diabierna 28 December 2018

Email: prensa@arubagovernment.aw Tel: 528-4900



GOBIERNO DI ARUBA

PROSPERO
2019
año nobo

Gobierno di Aruba ta gradici henter nos pueblo pa e confiansa y apoyo brinda durante di año 2018. Nos ta spera di por sigui conta riba e sosten aki den e año nobo nos dilanti. Hunto nos ta continua pa un Aruba Miho!



MINISTER EVELYN WEVER-CROES

Prome Minister di Aruba

*Feliz Dianan
di Fiesta!*

MENSAHE DI AÑA NOBO DI Prome Minister Evelyn Wever-Croes

Un año nobo ta den porta.

Y mescos cu cada comienso ta trece oportunidadnan nobo,
e comienso di año nobo aki tambe lo trece oportunidadnan nobo.
Ohala cu e año aki trece pabo y bo famia hopi bendicion y prosperidad.
Cu Fe y confiansa nos lo sigui construi un fundeshi firme pa nos pais.

Año 2018 a wordo tipifica pa re establece confiansa,
aki na Aruba mes y internacionalmente.

Nos no a logra completamente ainda pero nos ta riba e bon caminda.
E protocol firma cu Hulanda ta un prueba cu poco poco pero sigur
Hulanda ta hayando confiansa bek den Gobierno di Aruba.

Ta importante pa re establece confiansa, pasobra confiansa ta trece trankilidad.

Trankilidad pa nos por goberna y pa enfrenta e retongan nos dilanti.
Pa nos mantene confiansa cu nos a gana,
nos mester sigui pone e ser humano central riba tur teronan.

Aruba ta enfrentando retongan grandi ainda,
pero mescos cu den pasado nos a enfrenta nan cu exito,
mi tin tur confiansa cu e biah aki tambe nos lo sali exitoso di esaki,
uni como un gran famia.

Den nomber di mi coleganan di Gabinete Wever-Croes,
mi ta desea di gradici bo pa e confiansa y apoyo
brinda durante di año 2018 cu tawata yen di reto.

Nos ta spera di por sigui conta riba e sosten aki den e año nobo nos dilanti.
Hunto nos ta continua pa un Aruba miho!

Feliz y Prospero año 2019



GOBIERNO DI ARUBA

Feliz Aña Nabo

Aña 2019 Gobierno a proclama como "Aña di Famia".

Den e año nos dilanti nos lo consolida e esfuersonan den e Crisis Plan Social
pa crea un fundeshi mas firme pa nos famianan.

Pa brinda sosten pa crea famianan mas uni, solidario y feliz.
Un famia cu fundeshi fuerte por guia nos muchanan y hobennan
miho riba nan caminda di bida.

Nos lo sigui pone e ser humano central, brindando oportunidad na tur,
sin laga ningun hende atras.

Prome Minister Evelyn Wever-Croes



*Feliz Dianan
di Fiesta!*

MINISTER OTMAR ODUBER

Minister di Desaroyo Teritorial, Infrastructura y Medio Ambiente

E LO BAY RESORTA OFICIALMENTE BOU FPNA PARKE MARINO ARUBA TA KEDA OFICIALMENTE INSTITUI



Durante rueda di prensa di Gobierno di Aruba, Minister Otmar Oduber encarga cu Desaroyo

Teritorial, Infrastructura y Medio Ambiente a anuncia cu entrante prome di januari 2019, Parke Marino Aruba oficialmente ta keda introduci. Durante di e ultimo lunanan a hiba combersacion cu diferente instancia y grupo di piscado den diferente bario, a base di e combersacionnan aki a añadi un di 4 area protegi desde prome di januari den e parke marino. E di 4 area ta esun for di Lagoen/cas di gobernador te na Punta Brabo, cu excepcion di e areanan cu tin actividad di crucero tumando luga. Minister a splica cu a tuma e decision aki a base di e casi 90% di peticionnan cu a drenta di piscadonan cu ta sinti cu den

e area aki merece proteccion considerando e cantidad di reda tira y otro actividadnan, cu ta perhudica e cantidad di piscanan. Importante pa menciona ta cu, den e plan di maneho cu lo keda cla den e prome kwartaal di otro año lo indica locual cu mag den cada area protegi. E aspecto di maneho lo ta den man di Fundacion Parke Nacional Arikok (FPNA) cu lo ta encarga cu esaki. Na e momentonan aki ta finalisando e plan di maneho cu ta a base di input ricibi di e gran cantidad di piscadonan cu cual a reuni y scucha nan preocupacionnan y sugerencianan. For di cada rancho e piscadonan a apunta un representante cu a yuda cu registracion di e sugerencianan

aki pa por a inventarisa esakinan. Otro stakeholders tambe a yuda den e proceso pa yega na un plan di maneho, manera esnan di Turtugaruba y Aruba Birdlife Conservation. E plan di maneho mester ta cla prom cu 1 di maart 2019, pa e wordo aproba y pa cera e contract di maneho cu FPNA. Finalmente Minister Oduber a enfatisa cu ta importante pa comunidad ta bon informa di e proceso habri y transparente encamina pa loke ta proteccion di nos bida marino. Por subi e pagina di Facebook di Parke Marino Aruba unda cu regularmente ta publica informacion di e procesonan andando y e importancia.

GOBIERNO DI ARUBA A INSTITUI MORATORIO RIBA HOTEL Y CONDOMINIO NOBO

Durante rueda di prensa di Gobierno di Aruba, Minister Otmar Oduber encarga cu Desaroyo Teritorial, Infrastructura y Medio Ambiente a anuncia cu entrante prome di januari 2019, Parke Marino Aruba oficialmente ta keda introduci.

Durante di e ultimo lunanan a hiba combersacion cu diferente instancia y grupo di piscado den diferente bario, a base di e combersacionnan aki a añadi un di 4 area protegi desde prome di januari den e parke marino. E di 4 area ta esun for di Lagoen/cas di gobernador te na Punta Brabo, cu excepcion di e areanan cu tin actividad di crucero tumando luga. Minister a splica cu a tuma e decision aki a base di e casi 90% di peticionnan cu a drenta di piscadonan cu ta sinti cu den e area aki merece proteccion considerando e cantidad di reda tira y otro actividadnan,

cu ta perhudica e cantidad di piscanan.

Importante pa menciona ta cu, den e plan di maneho cu lo keda cla den e prome kwartaal di otro año lo indica locual cu mag den cada area protegi. E aspecto di maneho lo ta den man di Fundacion Parke Nacional Arikok (FPNA) cu lo ta encarga cu esaki. Na e momentonan aki ta finalisando e plan di maneho cu ta a base di input ricibi di e gran cantidad di piscadonan cu cual a reuni y scucha nan preocupacionnan y sugerencianan. For di cada rancho e piscadonan a apunta un representante cu a yuda cu registracion di e sugerencianan aki pa por a inventarisa esakinan. Otro stakeholders tambe a yuda den e proceso pa yega na un plan di maneho, manera esnan di Turtugaruba y Aruba Birdlife Conservation.

E plan di maneho mester ta cla prom cu 1 di maart 2019, pa e wordo aproba y pa cera e contract di maneho cu FPNA. Finalmente Minister Oduber a enfatisa cu ta importante pa comunidad ta bon informa di e proceso habri y transparente

encamina pa loke ta proteccion di nos bida marino. Por subi e pagina di Facebook di Parke Marino Aruba unda cu regularmente ta publica informacion di e procesonan andando y e importancia.





*P*a sirbi un pueblo bo mester stima un pueblo.
Pa mi ta un honor di por sirbi e pueblo cu mi ta stima.
Cu sentimento di gratitud profundo mi ta reflexiona riba e
confiansa cu pueblo di Aruba a sa di duna mi ekipo y ami,
sin esaki nos no por a logra nos metanan.
Den e aña nos dilanti lo bay tin retonan pa surpasa. Cu e
mesun confiansa cu comunidad di Aruba a dunami, hunto
nos lo sigui transforma retonan den oportunidad. Cu Dios
por drama su bendicion den boso cas.

Feliz dianan di fiesta y prospero aña nobo!



*Feliz Dianan
di Fiesta!*



MINISTER XIOMARA RUIZ-MADURO

Minister di Finansa, Asuntonan Economico y Cultura

Minister Xiomara Ruiz-Maduro a entrega premio na ganadornan di Festival di Dande Infantil y Hubenil 2018

Ayera diahuebs Aruba a celebra un bunita festival di Dande Infantil y Hubenil 2018. Minister Xiomara Ruiz-Maduro tabata presente y a

entrega premio na e felis ganadornan y a expresa palabra di pabien na tur e participante y ganadornan. E mandatario a dirgi

palabra na e publico presente a duna danki na Comision Promove Cultura, como tambe na tur mayor y tur esnan cu ta tuma tempo pa siña

y guia nos hobennan pa nan por biba nos tradicion cultural di fin di año. Tabata un anochi hopi bunita caminda nos hobenan a duna un

tremendo presentacion y muestra nan amor pa nos tradicion cual ta unico aki na mundo. Ay Nobel!





Minister Xiomara Ruiz-Maduro durante e Reunion den Parlamento: 'Nos ta traha serio y duro pa recupera credibilidad financiero di Pais Aruba local y internacional'



Minister di Finansa, Asuntonan Economico y Cultura a contesta diligentemente e preguntanan durante e reunion Parlamentario pa aproba Presupuesto 2019 di Pais Aruba.

Ta importante pa menciona cu e situacion financiero cu actualmente nos Pais Aruba ta aden ta refleha e mal gobernacion die gobiern anterior irresponsabel cu a redobra e debe di 2 biyon pa 4 biyon den apenas ocho año. Gabinete Wever-Croes a demostra durante año 2018 cu trabao duro y dedica a logra pone nos Pais Aruba riba caminda pa un finansa publico manehabel y duradero.

REFORMA FISCAL
Pa clarificacion Minister Ruiz-Maduro ta splica cu den e Reforma Fiscal lo no bin cambio di tarifa di BBO, BAZV y BAVP. Ta bon pa remarca cu BBO ta un 'ondernemings

belasting', un impuesto pa e compania y e no ta un 'salestax'. E cambio di ley cu a wordo aproba den Staten den ta brinda e consumidoran e claridad necesario ariba e prijs cu ta cobra ora ta cumpra cualquier producto y/of servicio. Awor ta wordo regla cu un empresario por establece prijsnan cu ta inclui tur impuesto sin menciona esaki apart ariba e factura. Pues e informacion cu productonan ta bay bira mas caro paso e tarifa di BBO, BAZV y BAVP ta bay subi ta incorrecto. E tarifanan di BBO, BAZV y BAVP lo keda mesuncos; si e prijs di e producto/servicio cambia lo no ta pa motibo di impuesto paso e tarifanan lo NO cambia. Gobierno lo duna un periodo di transicion pa acomoda e comerciantenan, pa asina duna nan tempo pa haci e ahustenan necesario. Ta bon pa

menciona cu e intencion di governo ta pa bay revisa e sistema di BBO/BAZV y BAVP den e di dos fase, eliminando asina e 'crisiheffing' temporal den un cambio structural a largo plazo.

Tocante di e 'sin taxes', Gobierno tin un montante di Afl. 16.600.000 presupuesta. 'Sin taxes' ta impuesto riba productonan cu por causa comportacion negativo of ta dañino pa salud, manera alcohol y sigaria. Den e prome fase di e Reforma Fiscal lo introduci dia 1 di januari 2019, invoerrechten / accijnzen ariba alcohol y tabaco. Den e di dos fase ta e intencion pa demotiva consumo e di productonan cu no ta saludabel. Banda di esaki Gobierno ta trahando pa amplia e Canasta basico cu productonan saludabel.

PROTOCOL FIRMA CU HULANDA

Gabinete Wever - Croes a firma un protocol na novembr ultimo cu Hulanda, den cual a pone normanan presupuestario pa guia Gobierno pa yega na un maneho di finansa sostenibel y recobra e credibilidad financiero local y internacional. E protocol aki ta duna nos gobiern e trankilidad tambe pa por goberna. Parlamento tambe a aproba e normanan aki cu un mocion. Gobierno na ningun momento a entrega autonomia di Aruba na Hulanda. Nos ta refresca memoria di miembronan di oposicion cu no ta prome biaha Aruba ta firma un protocol cu Hulanda. Den pasado caba e Gobierno anterior a traha 'budget discipline regels na 2006 Aruba y Minister di e tempo ey a tuma decision pa aplica reglanan presupuestario. Na 2011 tabatin un protocol, na 2013 tabatin otro protocol di

Witte Donderdag, na novembr 2013 tabatin mas protocol di Balanced Budget Akkoordyna 2015 tabatin otro protocol. Si e gobiern anterior a goberna y a maneha placa di pueblo na un manera responsabel, awe lo no tabatin mester di NINGUN protocol cu Hulanda.

Meta recobra credibilidad financiero local y internacional
E cambianan cu Gabinete Wever-Croes a introduci tabatin su motibo, cualnan ta pa mehora e situacion di finansa publico cu nos Pais Aruba tabata aden. E ta un acto di necesidad, responsabel cu ta exhi curashi pa haci algo na beneficio na e pais aki y pa nos futuro generacion. "No ta facil pa goberna Pais Aruba bou di e condicionnan cu nos a hañe. Pero nos ta decisivo pa hiba e Pais aki dilanti. Nos ta traha cu curason y mente y determina pa drecha e situacion financiero di nos Pais Aruba pa nos por recobra credibilidad financiero local y internacional. Pa logra esey nos ta dispuesto pa goberna pia abao mes ma no cu klompen' den cabes – paso nos yiunan y e futuro generacion merece mihor", Sra. Minister Xiomara Ruiz-Maduro a contesta den e reunion Parlamentario di Presupuesto 2019 di Pais Aruba.

Minister Xiomara Ruiz Maduro ta yama danki pa tur sosten y confiansa

Cu deseonan di un feliz cambio di año pa nos comunidad



Minister Xiomara ta haya cu 2018 tabata un año cu a encontra hopi reto, especialmente riba e tereno financiero, pero e governo a logra di surpasa tur. Segun Minister di Finansa, Asuntonan Economico y Cultura '2018 tabata un año intensivo, den cual nos a traha serio, duro, dedica pa busca un direccion pa yega na un finansa publico duradero'. Un año den cual a demostra cu union ta haci nos fuerte. Gobierno mester a tuma pasonan significativo pa mehora situacion financiero di nos Pais y tabatin e curashi pa tuma decisionnan necesario pa cambia rumbo di e Pais aki. Minister Ruiz-Maduro ta consiente cu e no ta un tarea facil y ta convenci cu determinacion y cooperacion di henter nos aparato gobernamental, Parlamento y nos comunidad, lo logra drecha e situacion financiero di nos Pais.

Riba tereno di Economia governo a traha pa prome bez un Plan Economico Integral. Tambe hunto cu un experto a identifica hunto cu stakeholders di sector priva y publico, seis sector prometedor, cu lo bay implementa den e añanan venidero. Den Cultura a logra algo significativo; gobierno a decreta año 2018 como e Año di Papiamento. Alavez Parlamento a decreta e Ley di ortografia di Papiamento.

Minister Ruiz-Maduro lo sigui traha cu mesun entusiasmo y diligencia den 2019.

Minister Xiomara ta yama danki na tur colega den tur Departamentonan, coleganan Minister, Parlamentarionan y comunidad en general cu a brinda nan, sosten, confiansa y cooperacion na nos gobierno durante 2018. Minister Ruiz-Maduro ta spera di por conta cu mesun tremendo cooperacion den 2019. Minister Xiomara ta desea henter nos comunidad un cambio di año trankil den compania di famia y un Feliz 2019! Ay nobe!



MINISTER ANDIN BIKKER

Minister di Husticia, Seguridad y Migracion

*Feliz Dianan
di Fiesta!*

INNOVACION DEN MINISTERIO DI HUSTICIA TA RIBA AGENDA DEN REUNION DI JVO FIN DI JANUARI 2019 SEGUN MINISTER DI HUSTICIA MR. ANDIN BIKKER



Minister di Husticia tin su agenda cla pa año 2019. E mandatario kier pa cada comienzo of fin di un luna para keto y refleha kico a pasa e luna anterior y di eynan wak kico tin den e siguiente luna den e plan pa ministerio di husticia. Segun Minister Bikker, reflehando año 2018, no obstante cu a haya hopi reto financiero, tampoco no a haya un traspaso debido di e gobiernu anterior. Tur esaki a haci cu a dificulta e trabounan hopi y crea tardansa debi cu no tin documentacion. Segun Minister Bikker, no tabatin file unda pa busca esakinan. Ora bin pregunta riba cierto contrato y dicon gobiernu no ta respeta esaki e pregunta tabata


unda e contrato ta? Mester a pidi copia di e contrato of contractonan y esey a haci cu tur e retoran aki haya tardansa. Pero a lora manga y cuminsa goberna segun e mandatario. Den año 2018 a pone tur cos na ordo, pasa presupuesto 2018, 2019 y presupuesto supletorio cu a pone cu ta cumpliendo cu e acuerdo di gobernacion. Pa prome biahia den ocho año Ministerio di Husticia tin su plannan y ta sigui esaki manera mester ta segun Minister Bikker. Plannan ta importante pasobra ora tin metanan cu kier logra pa e pueblo mester tin un plan. Cu e plan a logra den 2018 baha criminalidad di impacto

grandi bou control, baha esaki den 1 año y 1 luna na mita compara cu 2016 y 2017. Tambe a pone mas visibilidad di KPA riba caya, a introduci polis di bario bek esun na Mabon y mehoracion di vigilancia na frontera nan. Den plannan pa 2019 pa lunanan di Januari y Februari, ta bay keda cla cu e proceso pa cuerpo policial por haya e radar y helicopter. Segun Minister Bikker esaki nan ta na fase final. Cuerpo policial tambe ta bay haya uniform nobo y e metal sharks nan cu a yega Aruba ta bay pone nan den servicio den e prome siman di januari. Lo start un proceso di RFI, Request for Information pa prizon nobo. Manera ta conoci un di e metanan crucial den cuadro di reduci criminalidad ta pa yega na un prizon nobo, pasobra kier caba cu recidivismo door di yuda e personanan cu sali liber pa integra bek den comunidad. Pero lamentablemente hopi di nan ta bolbe haya nan cu husticia y ta bolbe drenta bek prizon. Esey ta yama e draaideur syndrome segun Minister Bikker.

E RFI ta mesun proceso cu a haci pa tanto e helicopter como e radar. Den luna di Januari ta bay pidi cooperacion di parlamento pa trata e ley pa por amplia e cantidad di notarionan y tambe e central testament register cu di año 1986 bin ariba no tin un base legal. Ta trata di e lista positivo cu a adapta di Antia Hulandes e tempo y a ser laga afo. Segun Minister Bikker el a constata esaki y mesora a introduci un nota di cambio y den januari cu cooperacion di Parlamento Dios mediante lo trata e ley aki. Ta premira cu prome cu 14 di februari lo trata codigo civil boek twee. Esaki ta codigo civil pa cooperacion cu tin hopi año y mas of menos for di 1995 un comision tabata traha riba un boek twee. Tanto Corsou como Sint Maarten tin e for di basta año y Hulanda sigur. Segun Minister Bikker, Aruba a cay atras cune y pesey ta bay trata esaki tambe. Fin di januari ta bay tin JVO aki na Aruba unda e cuater ministernan di husticia di Reino, Hulanda, Corsou, Sint Maarten y Aruba ta bini hunto.

Durante e reunion di JVO a pone innovacion riba agenda unda kier haci uso di tecnologia pa procesonan bay hopi lihe cu por administra husticia mas eficiente, mas efectivo y tambe duna accesibilidad na e ciudadano cu mester di servicio di gobiernu. Un ehempel di esaki ta aplicacion pa un evento. Si un persona mester di un permiso pa organiza un evento e por haci e aplicacion electronico. Esakinan ta cosnan concreto cu basicamente 24/7 ta na alcance di e pueblo pasobra awendia hopi tin un telefon cu ta mas poderoso cu un computer di 15 año pasa. Hulanda den su presupuesto 2019 ta invertiendo como 500 miyon Euro pa loke ta trata innovacion di husticia. Segun Minister Bikker, momento cu Hulanda ta avansando asina, por pidi cooperacion di nan pa comparti software gratis y tambe nan por manda persona pa duna instruccion riba e sistema aki.

BENDEMENTO DI Klapchi TA FOR DI 27 TE CU 31 DI DECEMBER Y TIRA Klapchi POR TE CU 2 DI JANUARI SEGUN MINISTER ANDIN BIKKER



Minister di Husticia mr. Andin Bikker diahuebs mainta durante conferencia di prensa di gobierno a anuncia orario y dia cu por bende y tira klapchi. Diaranson ultimo Minister Bikker a decreta dos decreto di cual un dinan ta regarda e orario y dianan cu por bende klap. Entrante diahuebs 27 di decembre te cu 31 di decembre ta bende vuurwerk te cu 10'or anochi. Esunnan cu tin permiso mester tene

cuenta cu tur exigencia cu tin den e permiso pa bende klap segun reglanan stipula. E di dos decreto ta e dianan cu ta stipula cu por tira klap riba caminda grandi cu ta diahuebs 27 te cu januari 2 te den oranan di atardi. Aña pasa e comision encarga cu vuurwerk a anuncia cu te dia prome di januari pero debi cu tin cierto remarca di pueblo riba esaki, a evalua y a stipula cu ultimo dia pa tira klap ta dia 2 di januari. Segun Minister Bikker a realisa cu dia 1 te dia 6 di januari tin algun persona cu tin e tradicion cu aki aya den nan cura ta tira klapchi y lo bay observa esey. Pero si mester tene cuenta cu tin regla y no ta permiti pa tira den cercania di hospital, den cercania di misa y ni tira klapchi cerca di pomp di gasolin. Tambe minister Bikker a haci un apelacion pa supervisa e criaturanan ora nan tira klapchi pero tambe adultonan mester bay cu cuidao. Mester corda cu klap ta algo peligroso y sigur ningun hende kier lamenta ningun incidente despues. Esaki ta un permiso general unda tur esunnan cu ta bende klap por haci esaki for di 27 pa 31 di decembre te cu 10'or anochi. E dianan cu por tira klapchi ta for di 27 decembre te cu 2 di januari.

Feliz año nobo!



GOBIERNO DI ARUBA

Ta mi sincero deseo cu año 2019 ta un año cu hopi salud y felicidad

Un año cu hopi exito y sabiduria.
Un año di paz y prosperidad yena cu momentonan bunita cu hopi amor y alegría den cada hogar.


Den nomber di mi familia y como Minister di Husticia mi kier desea personal di Ministerio di Husticia, henter pueblo di Aruba y tur Arubiano den exterior un Bon y Prospero año 2019.

Cu nos bon Dios sa proteha y compañía cada un di nos henter año.

Mr. Andin C.G. Bikker



Minister di Husticia,
Seguridad y Integracion



WEB LO CONSTRUI UN PLANTA DI ENERGIA CU MOTORNAN RECIP

Recientemente compania di awa y energia WEB Aruba a firma un contrato cu e compania internacional Wärtsilä pa construi un planta di energia cu motornan RECIP riba tereno di WEB. E planta nobo ta consisti di 6 motor RECIP cu un capacidad total di

102 MW. Cu esaki ta crea un base firme pa e transicion pa un futuro mas limpi y liber di Heavy Fuel Oil (HFO). E motornan lo crea e flexibilidad den e mix di energia actual y ta mas eficiente compara cu e boilernan anticua cu ainda ta forma parti di e planta. Consecuentemente

lo reemplaza e boilernan cu e motornan nobo. Uzo di e planta, cu lo yama RECIP fase IV, lo conduci na un reduccion drastico di uzo di combustibel y pues menos emision di carbon, cual lo tin un impacto positivo riba medio ambiente.





COMUNICADO DI PRENSA

E lo uza 850 menos bari di fuel oil pa dia

WEB ARUBA TA FIRMA ACUERDO CU WÄRTSILA PA CONSTRUI E DI CUATER PLANTA DI MOTORNAN RECIP

ORANJESTAD – Recientemente compania di awa y energia WEB Aruba a firma un contrato cu e compania internacional Wärtsilä pa construi un planta di energia cu motornan RECIP riba tereno di WEB. E planta nobo ta consisti di 6 motor RECIP cu un capacidad total di 102 MW. Cu esaki ta crea un base firme pa e transicion pa un futuro mas limpi y liber di Heavy Fuel Oil (HFO). E motornan lo crea e flexibilidad den e mix di energia actual y ta mas eficiente compara cu e boilernan anticua cu ainda ta forma parti di e planta. Consecuentemente lo reemplaza e boilernan cu e motornan nobo. Uzo di e planta, cu lo yama RECIP fase IV, lo conduci na un reduccion drastico di uzo di combustibel y pues menos emision di carbon, cual lo tin un impacto positivo riba medio ambiente.

E planta lo opera inicialmente riba HFO. Sinembargo, asina cu gas likido natural (LNG) bira obtenibel na Aruba, e planta lo opera primariamente riba LNG. En caso ta necesario, e planta di motornan RECIP lo tin e capacidad di switch pa HFO y of algun otro tipo di fuel oil.

E flexibilidad di e 6 ‘Wärtsilä 50DF dual-fuel engines’ cu lo suministra e energia di e planta, ta facilita e integracion di nivelnan halto di energia di biento y solo den e sistema. Nan capacidad pa yega na un resultado maximo den cuestion di minuto y suministra un balansa efectivo, ta sigura un stabildad di e sistema pa carga fluctuacion inevitabel den suministro di energia di biento y solo.

“WEB a bin ta tuma pasonan agresivo pa aumenta eficiencia y diversidad den su plantanan di energia. Punto di enfoke den esaki ta adoptacion di nivelnan mas halto di energia sostenibel. Pa e motibo aki nos mester reemplaza nos planta existente cu ekipo mas eficiente y flexibel den uzo di combustibel. E planta di motornan RECIP nobo di Wärtsilä tin e eficiencia y flexibilidad cu ta cuadra cu nos necesidadnan”, asina Luis Oduber, CEO di WEB Aruba a comenta durante e acto di firmamento di e contract hunto cu Rodney George, vice presidente di Caribbean Wärtsilä Energy Solutions.

A planea pa Wärtsilä entrega e planta na WEB den di 4 kwartal di 2019 y pa e ta completamente operacional na februari di año 2020.



MINISTER DANGUI ODUBER

Minister di Turismo, Salud y Deporte

MINISTER DANGUI ODUBER CU UN TREMENDO DONACION DI 15 MIL FLORIN NA FEPO.



Minister Turismo, Salubridad Publico y Deporte, Sr. Dangui Oduber ta haya cu ta sumamente importante pa nos yuda tur e fundacionnan den salubridad cu ta trata na yuda comunidad di Aruba. Relaciona cu esaki, recientemente Sr. Dangui Oduber a haci su bishita na FEPO pa haci entrega di un bunita donacion cu sigur ta un muestra di aprecio pa

e trabou noble cu nan ta haci pa comunidad di Aruba mirando cu FEPO ta trata e problemanan cu hende ta encontra cu nan oido. Minister a splicanan cu nan ta den e proceso cu AZV pa cambia e ley pa asina yuda FEPO mas miho. Mirando cu temporada di fin di año ta yegando Minister di Salubridad ta haya cu ta necesario pa haci un contribucion chikito na FEPO

pa yuda nan cu fondonan pa cumpra e aparatonan necesario pa yuda tur esnan cu di un manera of otro tin problema cu nan oido. Logopediste di FEPO Sra. Kristel van Nes a gradici Minister Dangui Oduber pa su donacion. Sra van Nes ta splika cu awendia den temporada di fiesta mester crea mas conscientisacion pa hendenan cuida nan

ido. Na Aruba e cantidad di hendenan bou di 65 año cu tin problema di oido ta alarmante. Pesey e parti di conscientisacion ta hopi importante. Mas cliente ta yama FEPO y esaki ta trece cune un wachtlijst basta largo cu ta trece hopi mas trabou y ta pesey FEPO ta masha agradecido pa tur yudansa cu ta yega nan caminda.



Bon Pasco y Feliz Aña 2019
TA UN DESEO DI
MINISTER DANGUI ODUBER Y FAMIA



MINISTER CHRIS ROMERO

Minister di Transporte, Comunicacion y Sector Primario

MINISTER CHRIS ROMERO Y MINISTER STEVEN MARTINA A FIRMA MOU PA REALISACION DI FAST FERRY

Durante un evento na Cosecha San Nicolas y den presencia di dignatarionan y demas invitado, Minister Chris Romero a ricibi Minister Steven Martina for di Corsou, pa asina haci oficial e MoU pa cu Proyecto di Fast Ferry entre Aruba y Corsou.

For di momento cu a asumi e responsabilidad como titular di e carteranan di Transporte, Comunicacion y Sector Primario, Minister Chris Romero a informa su mes debidamente riba e Proyecto Fast Ferry, pa asina cuminsa cana e caminda pa haci'e un realidad. A cuminsa na sinta y scucha stakeholders na Aruba, a bay Corsou y reunii cu, entre otro, Minister Steven Martina mes, Minister Zita Jesus-Leito y Prome Minister Eugene Rhuggenaath.

For di e rapport FOICE a haya indicacion cu e Fast Ferry lo mester a sali for di Barcadera, pero Minister Romero a propone y decidi pa e sali for di San Nicolas. Saliendo for di e punto di bista aki, e idea pa articula e San Nicolas Ports Authority a nace, di cual su ley ta na Departamento di Legislacion actualmente.

E siguiente paso ta pa traha riba un s a m e n w e r k i n g s convenant, cu ta un documento juridico, unda tur aspecto di preparacion pa e proyecto ta documenta. E realisacion di e convenant aki ta dura 6 pa 8 luna. Despues, hunto cu Corsou, lo decidi ki compania lo bira e operador y asina cuminsa e preparacionnan fisico,



esta construccion di e terminal di Fast Ferry, cu lo transporta hende, auto y carga entre Aruba y Corsou.

Minister Chris Romero ta sinti sumamente honra di por a conta cu presencia di Minister Steven Martina pa asina logra oficialisa e acuerdo cu lo percura pa e Fast Ferry entre nos islanan bira un realidad. Esaki ta e prome fase di un futuro briyante pa pueblo di Aruba y Corsou.







www.impuesto.aw

ENTRANTE 1 DI JANUARI 2019 TIN CAMBIO DEN E TARIFA DI INKOMSTENBELASTING Y LOONBELASTING

Esaki en conexion cu ehecucion di prome fase di e Reforma Fiscal

Un di e cambionan relaciona cu e prome fase di e Reforma Fiscal ta encera e cambio den e tarifa di inkomstenbelasting y loonbelasting. Manera conoci e mesun tarifa cu ta valido pa inkomstenbelasting ta valido tambe pa loonbelasting. E tarifa aki ta hopi importante tanto pa e personanan priva como e doñonan di trabou. Departamento di Impuesto ta duna un splicacion riba e tarifa valido pa año 2019.

Cambionan

Den e tabel akibou por mira e diferencia entre e tarifa actual (2018) y esun valido pa 2019.

Cambionan	2018	2019
Suma liber di impuesto (belastingvrije som)	Afl. 20.455	Afl. 27.751
Grupo di tarifa (tariefgroep)	Grupo di tarifa 1 Grupo di tarifa 2	Un grupo di tarifa
Categoria di entrada (inkomensschijven)	14 categoria di entrada	4 categoria di entrada Pa cada categoria, a cambia: <ul style="list-style-type: none">- e margen di entrada- e porcentahe di impuesto- e suma di impuesto

Tabel 2019

E tabel di impuesto 2019 ta como lo siguiente:

- Prome cu aplica e tabel pa calcula e suma di impuesto mester deduci e suma liber di impuesto (belastingvrije som).
- Na final ta baha e suma di impuesto cu a wordo calcula y hacie un suma cera.

	Na un entrada di mas cu e suma menciona den kolom I, pero no mas cu e suma menciona den kolom II,	e suma di impuesto ta bira e suma menciona den kolom III hunto cu e suma calcula a base di e porcentahe menciona den kolom IV. Ta calcula e porcentahe riba e parti di entrada cu ta surpasa e suma menciona den kolom I.		
	I	II	III	IV
1.	-	33.587		14,00%
2.	33.587	63.369	4.702,18	25,00%
3.	63.369	141.783	12.147,68	42,00%
4.	141.783	-	45.081,56	52,00%

Ehempel:

Entrada fiscal	Afl. 68.864	
Suma liber di impuesto	<u>Afl. 27.751 -/-</u>	
Entrada riba cual ta aplica e tabel	Afl. 41.113	(mira categoria di entrada nr. 2)
Kita suma di kolom II (categoria 2)	<u>Afl. 33.587 -/-</u>	
Saldo	Afl. 7.526	
Impuesto riba Afl. 41.113 segun kolom III (categoria 2)		Afl. 4.702,18
Impuesto riba Afl. 7.526 à 25% segun kolom IV		<u>Afl. 1.881,50</u>
Suma total di impuesto		Afl. 6.583,68
Inkomstenbelasting of loonbelasting cu mester paga		Afl. 6.583 (pa aña)

Pa calcula e inkomstenbelasting y loonbelasting automaticamente,
 Departamento di Impuesto a pone riba e homepage di su website un
 Excel File disponibel cu yama '**Berekening IB-LB 2019**'.



GOBIERNO DI ARUBA

an
Feliz Dia

ISLAONLINE
PA INFORMACION
CORECTO Y BERDAD

Gabinete Wever-Croes